

Air Sungai Jeluh melimpah akibat hujan lebat selama dua jam

Kajang dilanda banjir kilat

Oleh **MOHAMAD HARITH**
MOHAMAD NIZAR

pengarang@utusan.com.my

KUALA LUMPUR 29 Sept.
- Beberapa kawasan di sekitar pusat bandar Kajang dekat sini, dilanda banjir kilat sedalam kira-kira 0.6 meter ekoran hujan lebat sejak pukul 3.30 petang ini.

Jurucakap Jabatan Parit dan Saliran (JPS) Daerah Hulu Langat memberitahu, hujan lebat selama kira-kira dua jam menyebabkan paras air Sungai Jeluh meningkat secara mendadak.

Katanya, ia mengakibatkan longkang-longkang di bawah seliaan Majlis Perbandaran Kajang (MPKJ) tidak mampu menampung limpahan air sungai sehingga beberapa lokasi di pusat bandar Kajang dinaiki air.

"Sebanyak 50 buah kedai terjejas dalam banjir kilat itu namun tiada penduduk dipindahkan," katanya di sini, hari ini.

Bagaimanapun, menurut jurucakap itu, paras air telah surut dalam masa kira-kira 30 minit.

Pada Disember 2011, pusat bandar Kajang dilanda banjir kilat sedalam 0.3 meter menyebabkan banyak kenderaan terperangkap dan ditenggelami air.

Beberapa premis perniagaan antaranya Plaza Metro Kajang dan Bank Hong Leong cawangan Kajang, turut dinaiki air sedalam 0.2 meter, manakala kawasan lain yang terlibat



SEBAHAGIAN kedai di pusat bandar Kajang dinaiki air semasa banjir kilat selama kira-kira 30 minit semalam.

adalah pekan Semenyih berhampiran jalan ke Bangi Lama, pasar Besar Kajang dan Jalan Jelok.

Kawasan perumahan turut dinaiki air menyebabkan sembilan penduduk termasuk tiga warga emas terpaksa dipindahkan setelah terperangkap di rumah masing-masing.

Sementara itu, Ketua Unit Perancangan Korporat dan Perhubungan Awam MPKJ, Kamarul Izlan Sulaiman berkata, pihaknya telah

mengerah anggotanya untuk menjalankan kerja-kerja pembersihan sebaik hujan reda kira-kira pukul 5 petang.

"Ia melibatkan kerja membersihkan jalan raya dan kawasan sekitar yang dinaiki lumpur yang dibawa banjir kilat dari sungai berhampiran," katanya ketika dihubungi di sini.

Jelasnya, kerja-kerja tersebut dilakukan sehingga tengah malam tadi.



ANTARA lokasi di pusat bandar Kajang yang dilanda banjir kilat berikutan hujan lebat selama kira-kira dua jam semalam.